

इवनिंग डोगरी न्यूज़ बुलेटिन

समे .18:15 Hrs

एह आकाशवाणी जम्मू ऐ, संजा खबरें च तुंदा सुआगत, पैहलें खास-खास खबरें कन्नै में नरेश शर्मा।

<><><><><><>

Headlines

1. प्रधानमंत्री मोदी 5एं देसैं दे अपने दौरे दे चौथे चरण तैहत ब्राजील पुज्जी गेदे न, ओह अज्ज राती 17में ब्रिक्स शिखर सम्मेलन च शिरकत करडन।
2. 7 जहार अमरनाथ जात्रिएं दा 5मां जत्था अज्ज बड्डलै जम्मू थमां होआ रवाना।
3. अज्ज आशूरा-ए-मुहर्रम पूरी मजहबी अकीदत ते गंभीरता कन्नै मनाई जा'रदी ऐ।
4. गृह मंत्री अमित शाह होरें आखेआ जे डॉ. श्यामा प्रसाद मुखर्जी हुंदे बगैर कश्मीर कदें बी भारत दा अननुट हिस्सा नेई बनी सकदा ऐ।
5. जम्मू-कश्मीर च डॉ. श्यामा प्रसाद मुखर्जी हुंदे जीवन ते विरासत दे मानै च 2 बरें दा इक प्रचार समारोह शुरू कीता गेआ ऐ।

<><><><><><>

PM-Brazil

प्रधानमंत्री नरेंद्र मोदी होर अज्ज राती ब्राजील दे रियो डी जेनेरियो च शुरू होआ करदे ब्रिक्स शिखर सम्मेलन च हिस्सा लैडन। इस सम्मेलन दा मकसद मेम्बर मुल्खें बशकार साथ-सहयोग च बाददा करना ऐ। 17में ब्रिक्स शिखर सम्मेलन च कुल संसारी शासन सुधारें, जलवायु परिवर्तन सरबन्धी चुनौतियें, आर्टिफिशल इंटेलीजेंस ते होरनें मुद्दें पर चर्चा होग। सम्मेलन दा मकसद सेहत, कुल संसारी समस्याएं दे नबेड़े लेई आर्टिफिशल इंटेलीजेंस दे नैतिक इस्तेमाल, जलवायु परिवर्तन दी चुनौतियें कन्नै निब्बड़ने लेई माली जरूरतें गी पूरा करने लेई बैंक बवस्था च सुधार करना ते संतुलन आहले ते समावेशी कुल संसारी शासन गी बढ़ावा देना ऐ। प्रधानमंत्री होर सम्मेलन दौरान कई लीडरें कन्नै दक्खी मीटिंगां करडन।

<><><><><><>

Rajnath Singh Controllers Conference

रक्षा मंत्री राजनाथ सिंह होर कल नमी दिल्ली च नियंत्रक सम्मेलन 2025 दा उद्घाटन करडन। रखा खातें सरबंधी मैहकमे आसेआ इस त्रै रोजा सम्मेलन दा आयोजन कीता जा करदा ऐ। रक्षा मंत्रालय नै इक बयान च आखेआ ऐ जे इस प्रोग्राम च 8 उच्च सतरी कारोबारी इजलास लोआए जाडन जेदे च बजट ते खातें च सुधार, अंदरूनी लेखा परीक्षण सरिस्ते गी नमे सिरेआ तैयार करना, शोध च साथ-सहयोग, कीमतें गी तय करने मुतल्लक नवाचार ते समर्थ निर्माण सरबंधी क्षेत्र शामिल न। आखेआ गेआ ऐ जे एह इजलास मुकाबलेबाजी ते आत्मनिर्भर रक्षा उद्योग लेई रणनीतिक समर्थन दे कन्नै राजकोषीय विवेक च संतुलन बनाई रखने च उकीकृत माली सलाहकार दी उभरा करदी भूमिका दा पता लाडन। इस सम्मेलन च रक्षा खातें सरबंधी मैहकमे दे नुमाइंदे, सिविल अधिकारी, शिक्षाविद, विचारक ते रक्षा ते वित्त क्षेत्र सवां बक्ख-बक्ख धड़े शामिल होडन।

<><><><><><>

Yatra-Batch

7 ज्हार 208एं शिवभक्तें दा 5मां जत्था अज्ज बडलै श्री अमरनाथ आधार शिविर भगवती नगर जम्मू थमां कश्मीर घाटी लेई रवाना होआ। एह श्रद्धालु 307 गड्डिएं दे काफले च रवाना होए। इस इच 5 ज्हार 258 मर्द, 1 ज्हार 587 महिलां, 30 बच्चे, 277 साधु ते 56 साध्वियां शामिल हियां। इंदे चा 3 ज्हार 199 श्रद्धालु बालटाल आहले आधार शिविर ते 4 ज्हार 9 पहलगाम आहले आधार शिविर ताई रवाना होए जित्थुआं ओह श्री अमरनाथ जी दी पवित्र गुफा लेई रवाना होडन।

<><><><><><>

Pilgrims Vande Bharat

हाल च शुरू होई दी अमरनाथ जातरा लेई श्रद्धालु ते सैलानी श्रीनगर ते कटड़ा थमां वंदे भारत एक्सप्रेस रेल सेवा दा लाह ठोआ'रदे न। बड़ी मती रफ्तार कन्नै चलने आहली इस भलेआं अज्जै-कल्लै आहली रेलै नै इस पवित्र जातरा गी नमें आयाम दित्ते न। श्रद्धालुएं नां छड़ा आरामदायक, सुरक्षित ते घटोघट्ट समें च सफर कीता, सगुआं जम्मू-कश्मीर दे कुदरती शलैपे गी बी उनें बड़े कौलै थमां दिक्खेआ। जात्रुएं हासल करवाई जा 'रदिएं स्थूलतें ते इन्ने अरामदायक ते सैहल रेलै दे झूटे पर बड़ा संदोख बुज्जेआ। उनें अपने इस सफर गी रोमांचकारी ते यादगार दस्सेआ। केइएं श्रद्धालुएं आखेआ जे वंदे भारत एक्सप्रेस कन्नै उंदी जातरा होर सखल्ली होई गई ऐ।

<><><><><><>

Muharram

मुल्खे दे बक्ख-बक्ख हिस्सें च आशूरा-ए-मुहर्रम पूरे मजहबी अकीदत ते श्रद्धाभाव कन्नै मनाई जा'रदी ऐ। पैगम्बर मोहम्मद हुंदे पोत्रे हजरत ईमाम हुसैन होरें अपने साथिएं कन्नै करबला च सच्चाई धर्म ते न्यास दे सिद्धांतें दी खातर अपनिएं जिंदें

दा बलिदान दिता हा। प्रधानमंत्री नरेंद्र मोदी होंरें अपनी इक सोशल मीडिया पोस्ट च हजरत ईमाम हुसैन हुंदे बलिदान गी चेता करदे होई आखेआ जे उनें धर्म दा साथ देइयें लोकें गी मुश्कल हालात च बी सच्चाई कन्ने खड़ोने दी प्रेरणा दिती। जम्मू-कश्मीर दे लेफ्टिनेंट गवर्नर मनोज सिन्हा होर श्रीनगर च यौम-ए-आसूरा दे मौके पर पारम्परिक जुलजनाह जलूस च शिया लोकें कन्ने मौजूद रे। एह जलूस बोटोकदल दे अली पोरा इलाके थमां डाउनटाउन श्रीनगर दे जादीबल इलाके तगर चलोआ। इस दौरान सुरक्षा दे पुख्ता प्रबंध कीते गेदे हे। लेफ्टिनेंट गवर्नर होंरें जलूस च शामिल सोग करा रदे शिया समुदाय दे लोकें गी पान पलेयाआ। एहदे शा पैहले उनें जुलजनाह गी रस्मी तरीके नै पारम्परिक चादरें च लपेटेआ। जुलजनाह सांकेतिक रूप कन्ने ईमाम हुसैन हुंदे घोड़े गी दर्शादा ऐ।

<><><><><><>

ते हुन बाकि दिएं खबरें कन्ने नरेश शर्मा।

Sham-Kashmir

केंद्री गृह ते सहकारिता मंत्री अमित शाह होंरें अज्ज आखेआ ऐ जे डॉ. श्यामा प्रसाद मुखर्जी होंरें राष्ट्री अखंडता लेई अपना जीवन कुर्बान करी दिता ते उन्दे बिजन कश्मीर भारत दा इक अनचूट हिस्सा नेई होई सकदा।

शाह होर गुजरात दे आनंद च डॉ. श्यामा प्रसाद मुखर्जी होंरेंगी उंदी जयंती दे मौके पर उनेंगी श्रद्धांजलि देआ करदे हे। शाह होंरें सहकारिता मंत्रालय दे चार बरें पूरे होने पर अमूल ते एन.डी.डी.बी दे बक्ख-बक्ख विकास कम्में दा उद्घाटन कीता। एहदे कोला पैहले केंद्री मंत्री होंरें आखेआ जे सहकारिता सोसायटियें दा मुल्खे दे आर्थिक विकास च बड़ा महतवै आहला योगदान ऐ। उनें आखेआ जे दो लक्ख नमे PAC, सहकारिता विश्वविद्यालय, अन्नदाने दी बिक्री ते उत्पादन सरबन्धी 3 सहकारी सोसायटियें ते डेयरी कन्ने सरबन्धी 3 सोसायटियें कन्ने मुल्खे दे सहकारी अंदोलन होर तगड़ा होग।

<><><><><><>

LG-Mookerjee

लेफ्टिनेंट गवर्नर मनोज सिन्हा होर अज्ज डॉक्टर श्यामा प्रसाद मुखर्जी हुंदी 125मीं जयंती दे मौके पर श्रीनगर दे टैगोर हाल च लग्गे दे इक प्रोग्राम च शामिल होए। डॉ. श्यामा प्रसाद मुखर्जी होंरेंगी श्रद्धांजलि भेंट करदे होई लेफ्टिनेंट गवर्नर होंरें आधुनिक भारत दे इक्क वास्तुकार दे तौर पर उंदे योगदान गी चेता कीता। लेफ्टिनेंट गवर्नर होंरें जम्मू-कश्मीर दे उज्जवल भविक्ख लेई 'इक राष्ट्र-इक संविधान' दी वकालत करने, राष्ट्री एकता दी मजबूती लेई उंदी भूमिका ते डॉ. श्यामा प्रसाद मुखर्जी हुंदे जीवन ते विरासत दे सम्मान च 2 बरें दे इक अभियान दी शुरूआत करने बारे जानकारी दिती। उपराज्यपाल होंरें आखेआ जे डॉ. मुखर्जी होंरें जम्मू-कश्मीर दा भारत च एकीकरण करने लेई अपने जीवन दा बलिदान देई दिता। उनें आखेआ जे प्रधानमंत्री नरेंद्र मोदी होंरें मुखर्जी हुंदी शहादत दे 66एं बरें मगरा उंदा सुखना पूरा कीता।



Handicraft-GST

केंद्री बपार ते उद्योग मंत्री पीयूष गोयल होरें जम्मू-कश्मीर च हथकरघा ते हथखड्डियें सरबंधी उत्पादें गी बढावा देने च मदाद करने लेई माल ते सेवा टैक्स च कमी करने दी सफारिश करने दा वादा कीता ऐ। केंद्री मंत्री होरें श्रीनगर च एफ.टी.आई.आई बपार सम्मेलन च भाशण दिंदे होई आखेआ जे हथकरघा ते हथखड्डियें पर लगगे दे जीएसटी बारें द'ऊं-द'ऊं डैलीगेशनें मिगी जानकारी दिती ऐ। उनें आखेआ जे इस सरबंधी च मिगी ते खजाना मंत्रालय गी दरखास्त सोंपी ऐ ते अस एह पता ला करदे आं जे केह राहत मुहैया कराई जाई सकदी ऐ ते इनें चीजें पर जीएसटी दी दर 12 गी फीसदी कोला 5 फीसदी कीता जा। उनें एब्बी आखेआ जे जम्मू-कश्मीर च तौले गै पैकेजिंग ते डजैन सरबंधी इक्क उत्कृष्ट केंद्र खोलेआ जाग।



Baba-Sindh Gorla

बाबा सिद्ध गोरिया जी हुंदा मेला अज्ज साम्बा जिले दे रामगढ़ इलाके च धार्मिक श्रद्धा ते उत्साह कन्नै शुरू होई गेआ ऐ। उत्तर भारत दा एह मशहूर ते बरे च इक्क बारी लग्गने आहला मेला ऐ। श्रद्धालुएं अज्ज बड्डलै पवित्र तला च चलोबी लाई ते बाबा जी हुंदा स्माद्धि पर मत्था टेकेआ। मुल्ये दे बकख-बकख हिस्सें सवां श्रद्धालु अपने परिवार कन्नै इत्थै बाबा जी हुंदा शीरवाद लैने गी औंदे न। होर जानकारी देआ करदे न साम्बा सवां स्हाढे संवाददाता सतपाल शर्मा।



Tourism-Secretaries

सब्भनें राज्यें ते केंद्र शासित प्रदेशें दे सैलसफा सचिवें दी दो दिन चलने आहली कांफ्रेंस कल्लै थमां शरे कश्मीर अंतरराष्ट्री कन्वेंशन केंद्र च रम्भ होग। इस कांफ्रेंस दा आयोजन केंद्री सैलसफा मंत्रालय आसेआ कीता जा'रदा ऐ जेदे च पूरे मुल्ये थमां सैलसफा सचिव ते विभाग दे अध्यक्ष शामिल होडन जेडे सैलसफा सेक्टर दी बेहबूदी लेई रलिये नीति निर्धारण ते सामरिक योजना बारें उच्ची सतह दी गल्लकत्थ करडन। केंद्री संस्कृति ते सैलसफा मंत्रालय दे सीनियर अधिकारी, केंद्री गृह सचिव ते सचिव सैलसफा मंत्रालय इस आयोजन च शिरकत करडन। इस कांफ्रेंस च राष्ट्री सतह दे महत्वै आहले नीति निर्धारण आहले खेतर जियां सैलसफे कन्नै सरबंधत 2025-26 बरे दे बजट दी घोषणा, टकोहदे थारें दे विकास, ढांचागत विकास पैहलकदमियां मंजूर कीते गेदे प्रोजेक्टें दा जायजा, सैलसफा दे बाददे विकास लेई हीले, पूंजी निवेश दे मौके ते फिल्म सैलसफा दे विकास सरबंधत हीलें पर ध्यान केंद्रित कीता जाग। इस मौके पर कमिश्नर सैक्रेटरी सैलसफा यशा मुदगल,

सैलसफा विभाग कश्मीर ते S.K.I.C.C दे निदेशक बी मौजूद हे' जिने उ'नेगी आयोजन दौरान जरूरी चीजे बस्ते दी दस्तेयाबी मेजबानी ते सुरक्षा इंतजामे बारे ब्यौरा दिता।



News Read By : Naresh Sharma and Promila Jamwal

Composed by : Varinder Sharma

Editor : Yogesh Kumar
